



*27 September 2020*  
**Matius 25:14-30**



**MERIAHLAH KATAWARI PAKSA PE**



**L**it sada rumah sakit si khusus merawat kalak si ngidap penakit kanker stadium akhir, enterem kalak si kena kanker i bas rumah sakit e si enggo putus asa erkiteken ietehna maka ia tading nimai warina nari ngenca maka ia mate. I bas sada paksa reh me sekalak si mbaru denga iangkat jadi dokter, janah ia mereken sada metode si beda nampati pasien kanker enda. Ia la tergantung ku bas obat-obaten saja, tapi idamina cara kuga gelahna pasien-pasien banci nggejapken keriahen aminna pe enggo lit pinakit si mekelek i bas daging kulana. Hasilna memang labo malem pinakit kankerna, tapi erkiteken ermeriah ukur ia rusur reh gedangna umurna nggeluh.

Cerita enda nuriken man banta, maka mbelin kepeken ngaruhna keriahen ukur ras kesehaten daging kulata, 80% pikirenta enda mpengaruhi kesehatenta. Kalak si rusur nggejapken keriahen ukur rusur si idah ayona pe cerah ras awet muda. Adi rusur gulut ukurta, pasti melala pinakit si reh ku bas dirita, janah ayonta pe si idah pedas kal metua.

Rasul Paulus nuliskan surat man perpulungen Pilipi si jadi renungenta enda pe, nggejapken nanamna keriahen ukur.

Kai si erbahanca maka meriah ukurna? Eme erkiteken persadanna ras Jesus. Persadanna ras Jesus erbahanca ia ngasup ngataken bujur erkiteken igejapkenna kesempatan i bas kegeluhen enda eme sada pasu-pasu si luar biasa i bas kegeluhenna. Situhuna enda me kuncina keriahen ukur e, adi pusuh ras ukurta ngasup ngataken bujur man Dibata.

Emaka labo situasi ekonomi, jabu entahpe kalak si lit i sekelewetta erbahanca kita ermeriah ukur. Ciptaken keriahen ukurta, labo man daramen tapi tetap ermeriah ate. Keriahen ukurta pe banci nambahi immunta.